

### III. OUTRAS DISPOSICIÓNS

#### CONSELLERÍA DE MEDIO AMBIENTE, TERRITORIO E INFRAESTRUTURAS

*Orde do 28 de setembro de 2009 pola que se amplía o prazo dos artigos 3.1º e 13.1º da Orde do 27 de febreiro de 2009 pola que se convoca e se regula o réxime de concesión de axudas a pemes de Galicia para o financiamento de investimentos encamiñados á redución de emisións de gases de efecto invernadoiro.*

A Consellería de Medio Ambiente e Desenvolvemento Sostible mediante a Orde do 27 de febreiro de 2009 convocou e regulou o réxime de concesión de axudas a pemes de Galicia para o financiamento de investimentos encamiñados á redución de emisións de gases de efecto invernadoiro (DOG número 49, do 11 de marzo).

O artigo 3 (actuacións subvencionables) da dita orde establece que:

«1. Serán susceptibles de subvención os investimentos iniciados no ano 2009 e realizados ao longo dos anos 2009-2010.

As accións que se realicen soamente ao longo do ano 2009 deberán estar enteiramente executadas antes do 1 de outubro de 2009, e as que se prolonguen ata 2010, deberán terse executado antes do 1 de outubro deste ano».

Así mesmo, o artigo 13 (acreditación de traballos realizados) no seu parágrafo 1 establece que:

«Con carácter previo á percepción dos pagamentos, o representante da empresa beneficiaria deberá formular baixo a súa responsabilidade a conta xustificativa do gasto, acompañada de orixinal ou copia compulsada das facturas, xustificantes bancarios, transferencia de crédito (agás no que se refire aos pagamentos á Seguridade Social, Axencia Tributaria e Xunta de Galicia, no que sería exixible o documento de ingreso que proceda), ou calquera outro documento con validez xurídica que xustifique o investimento solicitado e o cumprimento do obxecto da subvención pública. Esta conta e xustificantes deberán presentarse antes do 15 de outubro de 2009 ou de 2010, segundo a anualidade que corresponda, ante a Dirección Xeral de Desenvolvemento Sostible co fin de que esta outorgue, se procede, a súa conformidade.

Considerarase gasto realizado o que foi efectivamente pagado con anterioridade á finalización do período de xustificación determinado».

Como consecuencia da dilatación do procedemento de concesión, considérase necesario ampliar os prazos dos anteditos artigos.

De acordo co novo Decreto 316/2009, do 4 de xuño, polo que se establece a estrutura orgánica da Consellería de Medio Ambiente, Territorio e Infraes-

truturas as competencias do director xeral de Desenvolvemento Sostible pasan a depender do secretario xeral de Calidade e Avaliación Ambiental, no relativo á Orde do 27 de febreiro de 2009 pola que se convoca e se regula o réxime de concesión de axudas a pemes de Galicia para o financiamento de investimentos encamiñados á redución de gases de efecto invernadoiro.

De acordo con isto, e en uso das atribucións que me confire o artigo 34 da Lei 1/1983, de febreiro, reguladora da Xunta e da súa Presidencia, en relación cos artigos 27.30º e 30 do Estatuto de autonomía para Galicia,

#### DISPOÑO:

Artigo 1º.-*Ampliación de prazo.*

Ampliar ata o día 30 de novembro de 2009 o prazo previsto no artigo 3 da Orde do 27 de febreiro de 2009 para que estean enteiramente executadas as accións que se realicen soamente ao longo do ano 2009, manténdose a mesma data de execución (1 de outubro de 2010) para as que se prolonguen ata 2010.

Artigo 2º.-*Modificación do artigo 13 (acreditación de traballos realizados) da Orde do 27 de febreiro de 2009.*

Os dous primeiros parágrafos do apartado 1 do artigo 13 da Orde do 21 de febreiro de 2009 quedan redactados do seguinte xeito:

«Con carácter previo á percepción dos pagamentos, o representante da empresa beneficiaria deberá formular baixo a súa responsabilidade a conta xustificativa do gasto, acompañada de orixinal ou copia compulsada das facturas, xustificantes bancarios, transferencia de crédito (agás no que se refire aos pagamentos á Seguridade Social, Axencia Tributaria e Xunta de Galicia, no que sería exixible o documento de ingreso que proceda), ou calquera outro documento con validez xurídica que xustifique o investimento solicitado e o cumprimento do obxecto da subvención pública. Esta conta e xustificantes deberán presentarse antes do 30 de novembro de 2009 para as accións que se realicen enteiramente no ano 2009, e do 15 de outubro de 2010, as actuacións realizadas ao longo de 2009-2010, ante ao secretario xeral de Calidade e Avaliación Ambiental.

Considerarase gasto realizado o que foi efectivamente pagado con anterioridade á finalización do período de xustificación determinado».

#### Disposición derradeira

Única.-*Entrada en vigor.*

Esta disposición entrará en vigor no mesmo día da súa publicación no *Diario Oficial de Galicia*.

Santiago de Compostela, 28 de setembro de 2009.

Agustín Hernández Fernández de Rojas  
Conselleiro de Medio Ambiente, Territorio  
e Infraestruturas